

SOLAT FARDHU SEBAGAI WADAH JAMA'AH DAN PERPADUAN UMMAH

1. Pendahuluan:

Solat mengukuhkan iman dan memperisaikan diri dari amalan fahsyah dan munkar. Apabila solat dilakukan secara berjama'ah, sudah pasti ia menghasilkan faedah yang lebih besar seperti pengenalan, persefahaman, tolong menolong serta perpaduan ummah yang sebenarnya di samping hikmat-hikmat lain. Jika solat fardhu yang sehari semalam lima waktu itu dilakukan secara berjama'ah di masjid atau di tempat azan dilaungkan, tentu lebih memantapkan lagi hikmah dan faedah solat tersebut.

Dalam kertas ini akan dijelaskan maksud solat berjamaah, Tuntutan solat fardhu berjama'ah menurut Al-Qur'an dan Al-Hadith, pendapat ulamak mengenainya, bagaimana solat fardhu berjama'ah menjadi wadah jamaah dan perpaduan ummah yang praktis, kesan solat berjama'ah aspek yariyah dan keadaan keuzuran yang diharuskan dari solat fardhu berjama'ah

2. Maksud Solat Berjama'ah:

Solat berjama'ah ialah ikatan yang berlaku antara solat imam dan ma'mum. (Al-Zuhailiyy, *Al-Feqh Al-Islamiyy*, 2/146).

Diantara solat yang dituntut berjama'ah; solat fardhu yang lima, solat Juma'at, solat dua hari raya secara tahunan di tiap-tiap negeri dan kampung.. (Al-Zuhailiyy, 2/146-147)

3. Tuntutan Solat Fardhu Berjama'ah:

Tuntutan berjama'ah pada solat fardhu, thabit dengan dalil-dalil Al-Qur'an, Al-Sunnah dan Ijma', seperti berikut:

(1) Menurut Al-Qur'an;

i. Firman Allah S.W.T., bermaksud:

أَقِمْوْا الصَّلَاةَ وَآتُوا الزَّكَاةَ وَارْكَعُوا مَعَ الرَّاكِعِينَ.

"Dirikanlah solat, tunaikanlah zakat serta ruku'lah bersama orang-orang yang ruku'." (Al-Baqarah 2 : 43)

Maksud ruku' bersama orang-orang yang ruku' ialah tuntutan supaya solat fardhu di lakukan secara berjama'ah.

FirmanNya lagi

وَإِذَا كُنْتَ فِيهِمْ فَأَقَمْتَ لَهُمُ الصَّلَاةَ ...

bermaksud:

"Dan jika engkau (hadir) bersama mereka, maka dirikanlah bersama mereka solat ..." (Al-Nisa' 4 : 102)

Pengajaran dari ayat-ayat di atas ialah bahawa jika solat dalam masa perang dituntut berjama'ah, maka tuntutan dalam suasana damai lebih *aula* (lebih kuatuntutannya). (Al-Zuhailiyy *Al-Feqh Al-Islamiyy Wa Adillatuh*, 2/147)

(2) Menurut Al-Hadith:

i. Sebda Rasulullah s.a.w. menurut riwayat Abu Hurairah:

صَلَاةُ الْجَمَاعَةِ أَفْضَلُ مِنْ صَلَاةِ الْفَذِّ سَبْعٍ وَعَشْرِينَ دَرَجَةً وَفِي رِوَايَةٍ : بِخَمْسٍ وَعَشْرِينَ دَرَجَةً

bermaksud:

"Solat berjama'ah lebih afdhal dari solat seorang diri dua puluh tujuh darjat". Menurut riwayat yang lain: "dua puluh lima darjat".

Riwayat Al-Bukhari, Muslim dan lain-lain (Al-Zabidiyy, *Taisir Al-Wusul*, 2/319

ii. Dari Ubai bin Ka'b r.a. katanya: Sabda Rasulullah s.a.w., :

... وَأَنَّ صَلَاةَ الرَّجُلِ مَعَ الرَّجُلِ أَزْكَى مِنْ صَلَاتِهِ وَحْدَهُ، وَصَلَاتُهُ مَعَ الرَّجُلَيْنِ أَزْكَى مِنْ صَلَاتِهِ مَعَ الرَّجُلِ.
وَكُلُّ مَا كَثُرَ فَهُوَ أَحَبُّ إِلَى اللَّهِ عَزَّوَجَلَّ

bermaksud:

"... Solat seseorang lelaki dengan seorang lelaki lain adalah lebih sempurna (azka) dari solat seorang diri, dan solatnya dengan dua orang lebih sempurna dari solatnya dengan seorang, dan setiap yang lebih banyak lebih disukai di sisi Allah A.W.J.."

Riwayat Ahmad, Abu Daud, Al-Nasa'iyy, Ibnu Huzaimah, Ibnu Habban dan Al-Hakim. (Al-Manzriyy, *Al-Targib Wa Al-Tarhib*, 1/264).

iii. Dari Abu Musa r.a. katanya: Sabda Rasulullah s.a.w., :

أَعْظَمُ النَّاسِ أَجْرًا فِي الصَّلَاةِ أَبْعَدُهُمْ مَمْشَى. وَالَّذِي يَنْتَظِرُ الصَّلَاةَ حَتَّى يُصَلِّيَهَا مَعَ الْإِمَامِ أَعْظَمُ أَجْرًا مِنَ الَّذِي يُصَلِّي ثُمَّ يَنَامُ.

bermaksud:

"Sebesar-besar pahala solat diperolehi oleh manusia ialah mereka yang paling jauh perjalanannya (untuk menunaikan solat), dan yang menunggu untuk bersembahyang beserta imam adalah lebih besar pahala dari mereka yang bersembahyang kemudian ia tidur."

Riwayat Al-Bukhariyy, (Al-Zabidiyy, *Taisir Al-Usul*, 2/320)

iv. Dari Ummu Darda', katanya: Abu Darda' telah datang kepadaku dalam keadaan marah. Maka aku bertanya:

مَا أَغْضَبَكَ ؟ فَقَالَ : وَاللَّهِ مَا أَعْرِفَ مِنْ أَمْرِ مُحَمَّدٍ (ص) إِلَّا أَنَّهُمْ يُصَلُّونَ جَمِيعًا.

Bermaksud:

"Apa yang menimbulkan kemarahan engkau? Maka jawabnya: Aku tidak tahu perintah Muhammad s.a.w. Sedang mereka semuanya (sama-sama - berjama'ah) melakukan sembahyang."

Diriwayatkan oleh Al-Bukhari. (Al-Zabidiyy, *Taisir Al-Wusul*, 2/321).

v. Dari Abu Hurairah r.a. katanya: Seorang buta (Ibnu Ummi Maktum) telah datang kepada Rasulullah s.a.w. dan berkata: Wahai Rasulullah, sesungguhnya tiada bagiku pemandu arah yang memandu aku ke Masjid (untuk menunaikan solat fardhu berjama'ah). Kemudian ia meminta Rasulullah s.a.w. melonggarkan tanggungan (solat berjamaah) baginya. Maka setelah ia berpaling untuk pergi, dipanggilnya oleh Rasulullah s.a.w. dengan bersabda kepadanya:

هَلْ تَسْمَعُ النَّدَاءَ ؟ قَالَ : نَعَمْ. قَالَ : فَأَجِبْ

bermaksud:

"Adakah engkau mendengar panggilan (azan)?" Maka jawabnya: "Ya". Maka sabda(nya): "Jawablah (yakni tunaikanlah secara berjamaah)."

Riwayat Muslim dan Al-Nasa'iy. (Al-Zabidiyy, *Taisir Al-Wusul*, 2/320. Lihat: Imam Muhammad Al-Kahlaniyy, *Subul Al-Salam Syarh Bulugh Al-Muram*, (Al-Qaherah: Al-Halabiyy, Edisi 4, 1960/1379) Jil. 2, hlm. 20.)

vi. Dari Ibnu Mas'ud r.a. katanya:

وَلَقَدْ رَأَيْنَا وَمَا يَخْلَفُ عَنِ الصَّلَاةِ إِلَّا مُنَافِقٌ قَدْ عَلِمَ نِفَاقَهُ أَوْ مَرِيضٌ. إِنْ كَانَ الْمَرِيضُ لَيَمْشِي بَيْنَ الرَّجُلَيْنِ حَتَّى يَأْتِيَ الصَّلَاةَ. وَقَالَ: أَنَّ رَسُولَ اللَّهِ (ص) عَلَّمَنَا سُنَنَ الْهُدَى، وَإِنَّ مِنْ سُنَنِ الْهُدَى الصَّلَاةَ فِي الْمَسْجِدِ الَّذِي يُوءَدُنُ فِيهِ.

bermaksud:

"Sesungguhnya aku melihat bahawa kita semua tiada yang membelakang solat (berjama'ah) melainkan orang munafiq yang sedia diketahui kemunafiqkannya atau orang sakit. Sekiranya ia sakit ia akan berjalan (memapah) antara dua lelaki sehingga mendatangi solat (berjamaah). Kemudian ia berkata: Sesungguhnya Rasullullah s.a.w. mengajarkan kita amalan yang benar (sunan al-huda) dan di antara amalan yang benar ialah melakukan solat di masjid yang diazankan padanya."

Riwayat Muslim dan Abu Daud.

Ditambah oleh Abu Daud:

وَمَا مِنْكُمْ مِنْ أَحَدٍ إِلَّا وَلَهُ مَسْجِدٌ فِي بَيْتِهِ. وَلَوْ صَلَّيْتُمْ فِي بُيُوتِكُمْ وَتَرَكْتُمْ مَسَاجِدَكُمْ تَرَكْتُمْ سُنَّةَ نَبِيِّكُمْ (ص)، وَلَوْ تَرَكْتُمْ سُنَّةَ نَبِيِّكُمْ لَكَفَرْتُمْ.

Bermaksud:

"Tidak ada seseorang dari kamu melainkan membuat masjid (tempat solat) di rumahnya, sekiranya kamu sembahyang di rumah kamu dan kamu tinggalkan amalan solat di Masjid kamu, (bererti) kamu meninggalkan sunnah Nabi kamu s.a.w. dan sekiranya kamu meninggalkan sunnah Nabi nescaya kamu menjadi kufur."

Riwayat Abu Daud. (Al-Zabidiyy, *Taisir Al-Wusul*, 2/321).

vii. Dari Abu Hurairah r.a. katanya: Sabda Rasullullah s.a.w.,:

أَثْقَلُ صَلَاةٍ عَلَى الْمُنَافِقِينَ صَلَاةُ الْعِشَاءِ وَصَلَاةُ الْفَجْرِ. وَلَوْ يَعْلَمُونَ مَا فِيهِمَا لَأَتَوْهُمَا وَلَوْ حَبَوًّا. وَلَقَدْ هَمَمْتُ أَنْ أُمَرَ بِالصَّلَاةِ فَنَقَامُ، ثُمَّ أُمِرَ رَجُلًا فَلْيُصَلِّ بِالنَّاسِ، ثُمَّ انْطَلِقُ مَعِيَ بِرِجَالٍ مَعَهُمْ حُزْمٌ مِنْ حُطْبٍ إِلَى قَوْمٍ لَا

Bermaksud:

"Seberat-berat solat ke atas golongan munafiq ialah solat 'Isya' dan solat Subuh. Jika mereka tahu kelebihan pada kedua-dua solat tersebut, tentu mereka akan menunaikannya (secara berjamaah) walaupun dengan cara merangkak (ke tempat solat). Sesungguhnya aku berhasrat (disatu masa) memerintah (sahabat-sahabat) menunaikan solat (fardhu secara berjamaah dengan memerintah seorang lelaki bersolat (menjadi imam) bersama-sama sahabat (yang hadir), kemudian aku akan keluar dengan sekumpulan lelaki bersama beberapa berkas kayu api untuk menemui mereka yang tidak menunaikan solat fardhu (dengan berjamaah) maka aku akan bakar rumah-rumah mereka."

Diriwayatkan oleh Priwayat Al-Sittah (yang enam) - Imam Al-Bukhariyy, Muslim, Malik, Abu Daud, Al-Tarmiziyy dan Al-Nasa'iyy. (Al-Zabidiyy, *Taisir Al-Wusul*, 2/321).

viii. Dari Ibnu 'Abbas r.a.: ... dan ditanya mengenai seorang lelaki yang (selalu) berpuasa disiang hari dan bangun di waktu malam, sedang ia tidak melakukan solat (fardhu) berjama'ah dan solat Jumaat? Maka sabdanya:

هَذَا مِنْ أَهْلِ النَّارِ.

bermaksud:

"Ini adalah dari ahl i neraka"

Diriwayatkan oleh Al-Tarmiziyy. (Al-Zabidiyy, *Taisir Al-Wusul*, 2/321).

xi. Dari Abu Hurairah r.a. katanya: Sabda Rasulullah s.a.w.:

مَنْ سَمِعَ الْمُنَادِيَ فَلَمْ يَمْنَعْهُ مِنْ إِتْبَاعِهِ عُذْرٌ لَمْ تُقْبَلْ مِنْهُ الصَّلَاةُ الَّتِي صَلَاهَا . قِيلَ : وَمَا الْعُذْرُ ؟ قَالَ :
خَوْفٌ أَوْ مَرَضٌ.

Bermaksud:

"Sesiapa yang mendengar orang memanggil (untuk solat - atau azan), dan tidak dihalangi oleh sebarang keuzuran (untuk menunai panggilan tersebut), tidaklah diterima solat yang dilakukannya. Ditanyakan: Apakah maksud keuzuran itu? Maka sabdanya: Takut (*khauf*) atau sakit"

Diterbitkan oleh Abu Daud. (Al-Zabidiyy, *Taisir Al-Wusul*, 2/320).

Menurut Ibnu `Abbas:

أَنَّ النَّبِيَّ (ص) فَسَّرَ الْعُذْرَ بِالْخَوْفِ وَالْمَرَضِ.

Bermaksud:

"Bahawa Nabi s.a.w. mentafsirkan uzur itu dengan (maksud) takut dan sakit."

Riwayat Abu Daud. (Lihat: Al-Zuhailiyy, *Al-Feqh Al-Islamiyy*, Jil. hlm. 1169 - 170).)

"Takut" (*khauf*) terbahagi tiga; takut ke atas diri atau harta atau ahli keluarga (Ibnu Qudamah, *Al-Mughniyy*, 1/451).

x. Dari Abu Darda' r.a. katanya: Aku mendengar Rasulullah s.a.w. bersabda:

مَا مِنْ ثَلَاثٍ فِي قَرْيَةٍ وَلَا بَدْوٍ لَا تُقَامُ فِيهِمُ الصَّلَاةُ إِلَّا قَدْ اسْتَحْوَذَ عَلَيْهِمُ الشَّيْطَانُ . فَعَلَيْكُمْ بِالْجَمَاعَةِ ، فَإِنَّمَا يَأْكُلُ
الذَّنْبُ مِنَ الْغَنَمِ الْقَاصِيَةَ.

Bermaksud:

"Tiada dari tiga orang di satu mukim dan kampung yang tidak mendirikan solat (berjama`ah) melainkan diganggu oleh syaitan. Maka hendaklah kamu (melakukan solat fardu) berjama`ah. Sesungguhnya serigala memamah kambing yang terpencil."

Riwayat Abu Daud - hasan. (Izzuddin Baliq *Minhaj Al-Salihein*, hlm. 145)

xi. Dari Yazid bin Aswad r.a. bahawa beliau telah bersembahyang Subuh bersama Rasulullah s.a.w. Apabila selesai solat tersebut, beliau mendapati dua lelaki tidak bersembahyang bersama Baginda, maka Baginda memanggil kedua-duanya dan bertanya: "Apa yang menghalang kamu bersembahyang dengan kami?" Jawab kedua-dua mereka: "Kami telah sembahyang di rumah kami." Maka sabda Baginda:

"فَلَا تَفْعَلْ، إِذَا صَلَّيْتُمَا فِي رِحَالِكُمَا ثُمَّ أَدْرَكْتُمَا الْإِمَامَ وَلَمْ يُصَلِّ فَصَلِّا مَعَهُ، فَإِنَّهَا لَكُمْ نَافِلَةٌ."

Bermaksud:

"Jangan kamu lakukan. Apabila kamu sembahyang di tempat kamu, kemudian menemui imam sedang ia belum sembahyang, maka sembahyanglah bersamanya, sesungguhnya ia (sembahyang) bagimu adalah kelebihan "nafilah" (sunnah)."

Riwayat Ahmad dan tiga periwayat lain dan disahkan oleh Ibnu Habbab dan Al-Tarmiziyy. (Lihat: Al-Kahlaniyy, *Subulu Al-Salam*, (Al-Qaherah: Al-Halabiyy, 1960/1379), Jil. 2, hlm. 21)

Hadis ini menuntut orang yang telah melakukan solat secara sendirian supaya mengulangi solatnya jika mendapati imam belum mendirikan solat, supaya dilakukan semula bersamanya.

(3). Tuntutan Berjama`ah Menurut Ulamak Feqah: (Di bawah tajuk ini di jelaskan bagaimana ulamak feqh memahami perintah syarak atau amalan Rasulullah s.a.w. mengenai solat berjama`ah?)

Berdasarkan Al-Qur'an dan Al-Hadith, yang di antaranya ialah nas-nas di atas, ulamak berbeza pendapat berhubung dengan hukum solat fardu berjama`ah, oleh sebab

percanggahan dalil-dalil pada perkara tersebut (Lihat: Ibnu Rushd, *Bidayah Al-Mujtahid*, Jil. 1, hlm. 121), seperti berikut:

i. Pendapat pertama:

Kata Al-Hanafiyyah dan Al-Malikiyyah (Al-Zuhailiyy, 2/149) serta sebahagian dari ulamak Al-Shafi'iyyah (Al-Nawawiyy, *Al Majmu'*, 1/93 dan Al-Zuhailiyy, 2/149): Berjama'ah pada solat fardhu selain solat Jum'at adalah sunat mu'akkad keatas lelaki berakal yang mampu menunaikannya. Tidak wajib ke atas wanita kanak-kanak, hamba, orang yang tidak berkeupayaan berjalan, orang sakit, orang tua, serta orang yang terpotong tangan dan kaki secara timbal-balik.

Ianya sunat kerana merujuk kepada *dhahir* hadis yang lalu (iaitu hadis yang bermaksud: "solat berjama'ah lebih baik dari solat berseorangan dua puluh lima kali ganda" atau "dua puluh tujuh kali ganda") yang menunjukkan bahawa solat dalam jama'ah adalah dari jenis yang disunatkan sebagai menambah-sempurnakan lagi solat fardhu yang wajib itu, seolah-olah seperti sabda Rasulullah s.a.w. (bermaksud): "solat berjama'ah lebih sempurna dari solat seorang diri". Keadaan yang "sempurna" adalah perkara yang melebihi pahala, bukan tuntutan yang dimestikan

Menurut Al-Zaahidiyy (Al-Hanafiyy), dimaksudkan dengan "sunat mu'akkad" dalam mazhab Hanafiyy ialah "wajib" (al-wujub) melainkan pada solat *jum'at* dan *'aid* maka ia adalah merupakan syarat (Ibnu'Abidin, *Al-Dar Al-Mokhtar*, Jil.1, hlm. 552)

ii. Pendapat kedua:

Menurut pendapat yang "asah" dari mazhab Al-Shafi'iyyah (Al-Nawawiyy, *Al-Majmu'*, 4/184-186, Al-Sharbiniyy, *Mughniyy Al-Muhtaj*, (Al-Qaherah: 1958/1377), jil. 1, hlm.229) dan Al-Zuhailiyy, 2/150) , hukum berjama'ah solat fardhu adalah fardhu kifayah ke atas lelaki yang merdeka, bermukim dan tidak bertelanjang, di mana solat tersebut menojolkan syi'ar jama'ah dengan mendirikannya di masjid (bukan di rumah) setiap kampung atau mukim. Jika semua enggan mendirikannya, diperangi. Tidaklah dituntut ke atas perempuan seperti tuntutan ke atas lelaki.

Di antara dalilnya, sabda Rasulullah s.a.w (pada hadis Abu Darda' di atas) yang bermaksud.:

"Tiada dari tiga orang di sesuatu qaryah atau kampung tidak ditegakkan sesama mereka (solat ber) jama`ah, melainkan dirasuk oleh syaitan. Maka hendaklah engkau berjama`ah, maka sesungguhnya serigala memakan kambing yang terpencil"

Riwayat Abu Daud dan Al-Nasaa'iy dengan diperakukan oleh Ibnu Habbab dan Al-Hakin.

Imam Al-Shafi'iy sendiri menyebutkan bahawa tidak harus seseorang lelaki meninggalkan solat berjama`ah, samaada bermukim atau bermusafir, beralasan hadis Abu Hurairah mengenai cadangan Rasulullah s.a.w. membakar rumah lelaki yang mengabaikan solat fardhu berjama`ah dan hadis Abdul Rahman bin Harmalah:

بَيْنَنَا وَبَيْنَ الْمُنَافِقِينَ شُهُودُ الْعِشَاءِ وَالصُّبْحِ، لَا يَسْتِطِيعُونَهُمَا ...

Bermaksud:

"Diantara kita dan golongan munafiq ialah kehadiran solat `Isya', mereka tidak berupaya ..."

(Al-Shafi'iy, *Al-Umm*, Jil. 1, hlm. 136)

iii. Pendapat Ketiga:

Menurut pendapat Al-Hanbaliyyah (Ibnu Qudamah, *Al-Mughniyy*, 2/130-131, Al-Rafi'iy, *Fath Al-Aziz*, Lihat: Al-Nawawiyy, *Al-Majmu`*, 4/283, Al-Zuhailiyy, 2/150-151) berjama`ah mendirikan solat fardhu adalah wajib_ainiyy, iaitu wajib ke atas setiap mukallaf.

Dalil mazhab ini dan mereka yang sama pendapat dengannya ialah ayat Al-Qur'an mengenai solat khauf dan ayat perintah ruku` bersama orang yang ruku, hadis Abu Hurairah mengenai solat terberat ke atas golongan munafiq ialah solat `Isya' dan solat subuh, hadis Abu Hurairah mengenai Rasulullah bersumpah untuk membakar rumah lelaki yang tidak menunaikan solat fardhu berjama`ah, hadis mengenai orang

rabun (seorang sahabat) yang dituntut berjama'ah jika mendengar azan, hadith Ibnu Mas'ud yang menjelaskan bahawa di zaman Rasulullah s.a.w. hanya orang munafiq sahaja yang tidak menunaikan solat fardhu berjama'ah dan hadith Jabir serta Abu Hurairah yang menafikan fadhilat jiran masjid yang bersembahyang di rumah sendirian dan hadith-hadith lain-lain.

Mazhab ini, diperkuatkan lagi wajib berjama'ah solat fardhu itu, oleh perintah syarak supaya solat khauf (sembahyang fardhu dalam keadaan perang - keadaan takut) dilakukan secara berjama'ah dan juga harus melakukan solat fardhu secara *jama'* oleh sebab hujan, yang semua itu tidak lain melainkan kerana keperluan menjaga solat fardhu supaya dilakukan secara berjama'ah.

Akan tetapi tidaklah berjama'ah itu sebagai syarat sah solat seperti di naskan oleh Imam Ahmad.

(4) Menurut Ijma':

Telah sabit ijma' al-sahabah bahawa tuntutan syarak terhadap solat berjama'ah adalah selepas Hijrah. Didalam *Al-Ihya'*, oleh Al-Ghazaliyy, dari Abu Sulaiman Al-Daraniyy katanya: "Tidak luput seseorang dari solat berjama'ah melainkan ia berdosa". Katanya lagi: Golongan Al-Salaf mengurungkan diri mereka tiga hari jika tidak sempat solat bersama imam dengan takbir pertama, dan tujuh hari jika tidak sempat berjama'ah.

4. Keadaan-Keadaan Yang Diharuskan `Uzur Dari Solat Fardhu Berjama'ah:

(1) Sakit; iaitu kesakitan yang menjadi keuzuran untuk hadir berjama'ah di masjid seperti demam panas, lumpuh, orang tua yang uzur dan seumpamanya. Dalil faktor ini ialah hadis Abu Hurairah dan Ibnu `Abbas yang di atas. Selain dari itu, Rasulullah s.a.w. ketika sakit, tidak hadir ke masjid dan berkata kepada sahabat:

..

مُرُّوا أَبَا بَكْرٍ، فَلْيُصَلِّ بِالنَّاسِ.

Bermaksud:

"Suruhlah Abu Bakar bersembahyang (menjadi imam) dengan manusia."

Riwayat Al-Bukhariyy dan Muslim. (Lihat: Al-Zuhailiyy, *Al-Feqh Al-Islamiyy*, Jil. hlm. 169.)

Rasulullah s.a.w. tinggal solat berjama`ah beberapa hari kerana sakit. (Al-Shafi`iyy, *Al-Umm*, 1/138)

(2) Takut; iaitu takut kemudaratan ke atas diri atau harta atau keselamatan keluarga atau dibimbangi sakit. Dalil harus uzur kerana takut ialah hadis Abu Hurairah dan Ibnu `Abbas yang di atas.

(3) Hujan; termasuk selut, udara terlalu sejuk, atau terlalu panas, angin kencang dan kegelapan yang bersangatan. Dalil uzur pada keadaan tersebut ialah hadis Ibnu `Umar r.a. katanya:

كُنَّا إِذَا كَانَ مَعَ رَسُولِ اللَّهِ (ص) فِي سَفَرٍ، وَكَانَتْ لَيْلَةٌ مُظْلِمَةً أَوْ مَطِيرَةً، نَادَى مُنَادِيهِ : أَنْ (أَوْ " أَلَا ")
صَلُّوا فِي رِحَالِكُمْ.

Bermaksud:

“Adalah kami apabila bersama dengan Rasulullah s.a.w. dalam perjalanan, sedang malam gelap atau hujan, pemanggilnya (mu`azzin) newlaungkan: “Tidakkah kamu bersembahyang di tempat tinggal kamu” (Al-Zuhailiyy, *Al-Feqh Al-Islamiyy*, Jil. 2, hlm. 171, Lihat: Al-Shafi`iyy, *Al-Umm*, (Al-Qaherah: Kitab Al-Sha`b, 1968/1388), Jil. 1, hlm. 138)

(4) Mengelak dari dua kekotoran, iaitu kekotoran air kecil dan kekotoran air besar kerana boleh menjejaskan kesempurnaan solat dan kekhusyukkan. (Al-Zuhailiyy, 2/171)

(5) Berhadapan dengan makanan bagi orang berpuasa setelah berbuka atau berbuka puasa atau wujud makanan di saat kelaparan atau kedahagaan yang bersanghatan. (Lihat: Ibnu `Abidin, *Radd Al-Mukhtar*, 1/555-556 dan Al-Shafi`iyy, *Al-Umm*, 1/138)

(6) Kebimbangan ditinggal oleh “qafilah” perjalanan bagi perjalanan bersama orang ramai dan bukan perjalan sendirian. (Lihat: Ibnu `Abidin, *Radd Al-Mukhtar*, 1/555-556 dan Al-Shafi`iyy, *Al-Umm*, 1/138)

(7) Terlalu mengantuk seperti peristiwa seorang lelaki berpisah dari berimamkan Mu`az kerana bacaannya yang panjang, dimana Rasulullah diam (tampa melarang) mengenainya selepas diketahuinya. Walaupun demikian, jika sabar untuk dapat berjama`ah atau terus berjama`ah adalah lebih baik. (Al-Zuhailiyy, *Al-Feqh Al-Islamiyy*, Jil. 2, hlm. 171)

(8) Berada di dalam kurungan, kerana Islam tidak menuntut melaksana sesuatu melainkan sekadar terdaya (Al-Qur'an dan Al-Hadith). (Al-Zuhailiyy, Jil. 2, hlm. 171.

(9) Ditambah oleh Al-Shafi`iyy; kebocoran atap diparamis perniagaan, gempa bumi, udara yang terlalu panas samaada malam atau siang, usaha mencari binatang hilang yang dijangka boleh ditemui, usaha mendapatkan barangan yang dirompak, gemok yang keterlaluan, keresahan yang menjejaskan kekhusyukan, sebok dengan pengurusan jenazah, ada orang yang boleh menyakitkannya di jalan ke masjid, suasana pengantin baru pada solat malam, imam membaca panjang dari yang sewajarnya atau imam tidak mengikut sunnah atau terlalu cepat bacaan atau imam dari kalangan orang yang dimakruhkan mejadi imam, atau dibimbangi berlaku fitnah baginya atau dengannya.

Pendapat ini disokong oleh Al-Hanabilah dengan menganggap uzur oleh sebab panjang bacaan imam dan sebab pengantin baru. Menurut Al-Maliyyah, gugur kewajipan solat Jum`at dan solat berjama`ah selama enam hari oleh sebab berbulan madu, dan tidak gugur pada hari ketujuh menurut pendapatnya yang masyhur. (Lihat: Al-Zuhailiyy, *Al-Feqh Al-Islamiyy*, 2/170 - 172)

5. Kesimpulan Hukum Solat Fardhu Berjama`ah:

Penyusun kertas ini tidak bertujuan mentarjehkan (memperkuatkan) mana-mana pendapat ulamak fiqh di atas mengenai hukum solat fardhu berjama`ah, akan tetapi sekadar mengemukakan nas-nas Al-Qur'an dan Al-Hadith serta pendapat ulamak muktabar seperti di atas, untuk sama-sama ditelitikan. Sehubungan dengan itu, dirumuskan kedudukan hukum dan perintah solat fardhu berjama`ah, seperti berikut:

(1) Dalil tuntutan solat fardhu dilakukan secara berjama`ah amat kuat, sehingga mendorong ulamak memperturunkan hukum, bahawa berjama`ah solat fardhu adalah *wajib `ainiyy* (wajib atas setiap mukallaf) - seperti pendapat Hanabilah dan Hanafiyah -

ke atas lelaki atau fardhu kifayah atau sunat mu'akkad (sunat yang kekuatanuntutannya hampir menyamai *wajib`ainiyy*).

(2) Rasulullah s.a.w. amat memarahi lelaki yang tidak menunaikan solat fardhu berjama`ah, walaupun orang itu berpuasa dan bangun malam, sehingga disebdakan bahawa mereka dari ahli neraka.

(3) Kemarahan Rasulullah s.a.w. itu sehingga membandingkan bahawa mereka yang tidak menunaikan solat fardhu berjama`ah itu sama seperti orang munafiq dan rumah-rumah mereka layak dibakar.

(4) Tuntutan solat fardhu berjama`ah itu sampai ke peringkat orang buta juga dituntut jika ada pemandu dan orang yang uzur jga dituntut jika ada orang yang boleh dipapahnya sampai ke sof solat.

(5) Keuzuran dari solat fardhu berjama`ah hanya layak bagi mereka yang sakit atau takut (khauf) sahaja atau berada dalam keadaan yang menghalang dari pergi ke tempat solat berjama`ah atau keadaan yang menuntut supaya tidal meninggalkan tempat berkenaan, bukan sebab sengaja.

(6) Syaitan sentiasa berusaha memesongkan masyarakat yang tidak mengambil berat tuntutan solat berjama`ah dengan berbagai-bagt cara.

(7) Semakin besar bilangan anggota jama`ah, semakin banyak kelebihan yang diperolehi.

6 Kekeliruan Mengenai Solat Berjama`ah:

Sering wujud dalam masyarakat anggapan dan tanggapan yang keliru mengenai ibadah solat berjama`ah, seperti berikut:

(1) Solat berjamaah sekadar untuk mendapat pahala lebih semata-mata. Tidak ada apa-apa celaan atau kutukkan Allah S.W.T. atau RasulNya. Oleh yang demikian, siapa yang melakukannya ia mendapat kelebihan dan siapa yang tidak melakukannya ia sekadar tidak mendapat pahala sahaja

(2) Mengagong dan membesarkan Allah S.W.T. hanya pada masa solat, ketika di atas kain sejadah sahaja, terutama pada hari Jum`at. Masa -masa lain tidak begitu penting dan terpulang pada kehendak masing-masing.

(3) Menganggap sembahyang tidak ada hubungan dengan pembentukan akhlak dan peribadi manusia. Seseorang yang menjadi baik tiada kena mengena dengan amalan solat.

(4) Menganggap sembahyang tidak kena mengena dengan penilaian seseorang itu berakhlak atau tidak. Kerana itu penilaian akhlak atau moral yang baik tidak diambil kira samaada seseorang itu melakukan solat atau tidak.

(5) Solat adalah amalan orang-orang dewasa dan orang-orang tua. Orang muda yang masih dalam keadaan yang sentiasa dipengaruhi oleh nafsu tidak sesuai untuk melakukan solat atau beribadat.

(6) Solah fardhu boleh diganti pada masa lapang jika sebok dengan urusan-urusan penting, seperti:

- banyak kerja-kerja sekolah di rumah
- alasan orang lain juga tidak mementingkan sembahayang
- kesukaran mendapat air untuk wudhu' - seperti dalam perjalanan
- kerja pejabat atau jadual syarahan di IPT terlalu padat atau perlu disegerakan
- ada tamu atau keluarga di rumah
- terlibat dengan sokan program negeri atau negara yang perlu benar-benar dijaga supaya tidak tergendala
- atau lain-lain alasan yang tidak munasabah dari segi syarak.

7. Solat Berjama`ah Sebagai Agenda Tarbiyah:

“Tarbiyyah” bererti pendidikan (education). “Tarbiyyah Islamiyyah” bererti pendidikan yang membina dan membentuk manusia menyedari dirinya sebagai hamba Allah S.W.T. (*`abd*) dan khalifah di bumi.

Solat lima waktu berjama'ah, selain dari mendapat pahala berganda dua puluh tujuh atau dua puluh lima kali ganda, solat berjama'ah mempunyai kelebihan yang banyak, terutama dalam membentuk individu dan masyarakat. Tegasnya solat berjama'ah berperanan besar dalam arina tarbiah Islamiyah, iaitu dalam pendidikan pendidikan Islam peringkat individu maupun pendidikan kemasyarakatan. Di antara peranan solat dalam agenda tarbiyah adalah seperti berikut:

(1) Aspek individu;

i. Mengelakkan dari gangguan syaitan, iaitu dorongan-dorongan yang membawa kepada mengabaikan perintah agama dan melakukan maksiat dan kemunkaran, samaada pada individu itu sendiri atau pada masyarakat. Dalil makksud ini iala hadis Abu Darda' yang diriwayatkan oleh Abu Daud seperti di atas dan juga hadis Anas r.a. dalam Synan Abi Daud bahawa Rasulullah s.a.w. bersabda:

وَالَّذِي نَفْسِي بِيَدِهِ، إِنِّي لَأَرَى الشَّيَاطِينَ تَدْخُلُ فِي خَلَلِ الصَّفِّ كَأَنَّهُا الْحَذَفُ.

Bermaksud:

“Demi yang jiwaku di tanganNya, sesungguhnya aku melihat syaitan masuk ke celah sof (sof yang jarang) yang rupanya seperti anak-anak kambing.”

(Lihat: Al-Kahlaniyy, Subul Al-Salam, 1960/1379, Edisi 4, Jil. 2, hlm. 29)

Akibat dari kelaziman seperti itu, ialah godaan dan pemesongan syaitan dan iblis terhadap diri orang yang solat dan kurang keberkesanan solat itu baginya.

ii. Latihan bagi individu untuk mengikut ketua, di mana keupayaan mengikut orang lain adalah merupakan amalan yang menuntut pengorbanan seseorang dari sifat mementing kehendak diri sendiri dan terlalu bertegas dengan pendapat sendiri tanpa keseiaan bnertolak ansur dengan kebenaran.

Imam solat adalah pemimpin yang memimpin pengikutnya ke arah mencari keredaan Allah S.W.T. dan mengikut perintahNya dengan mengikut hukum dan kaifiat pergerakan yang telah ditetapkanNya.

Abu Hurairah menyatakan, bahawa Rasulullah s.a.w. bersebda:

"إِنَّمَا جُعِلَ الْإِمَامُ لِيُؤْتَى تَمَّ بِهِ. فَإِذَا كَبَّرَ فَكَبِّرُوا، وَلَا تُكَبِّرُوا حَتَّى يُكَبِّرُ...".

Bermaksud:

"Sesungguhnya di wujudkan imam adalah untuk diikuti, maka apabila ia takbir maka hendaklah kamu takbir, dan janganlah kamu takbir melainkan sesudah ia takbir ...".

Riwayat Al-Bukhariyy dan Muslim serta Abu Daud, dan ini lafadz Abu Daud. (Lihat Al-Kahlaniyy, *Subul Al-Salam*, 1960/1379, Edisi 4, Jil. 2, hlm 22).

Rasulullah s.a.w. juga menjelaskan keburukan orang yang tidak mengikut disiplin yang ditentukan oleh Allah S.W.T. itu, seperti disebutkan oleh Al-Kahlaniyy:

أَنَّهُ (ص) تَوَعَّدَ مَنْ سَابَقَ الْإِمَامَ فِي رُكُوعِهِ أَوْ سُجُودِهِ بِأَنَّ اللَّهَ يَجْعَلُ رَأْسَهُ رَأْسَ حِمَارٍ

Bermaksud:

"Bahawa ia (Rasulullah s.a.w.) mengingatkam orang yang mendahului imam pada ruku' atau sujudnya, bahawa Allah akan menjadikan kepalanya kepala himar."

(Lihat: Al-Kahlaniyy, *Subul Al-Salam*, 1960/1379, Edisi 4, Jil 2, hlm 22).

Ini, di samping berdosa kepada Allah S.W.T. walaupun tidak rosak solat.

Perintah mengikut imam di samping mengingatkan akibat buruk mendahului tindakan imam seperti di atas, mengingatkam akibat buruk boleh berlaku kepada masyarakat Islam apabila ada kalangan mereka tidak mengikut imam atau ketua.

iii. Latihan disiplin yang tinggi, di mana setiap orang perlu meluruskan sof (barisan), merapatkan antara seorang dengan yang lain dan menyamakan kedudukan bahu, seperti dalam hadis Anas r.a. bahawa Rasulullah s.a.w. bersebda:

"رَصُّوا صُفُوفَكُمْ وَقَارِبُوا بَيْنَهَا وَحَاذُوا بِالْأَعْنَاقِ."

bermaksud:

"Luruskan sof, rapatkan antara satu dengan yang lain dan samakan bahu.dan samakan tengkok."

Riwayat Abu Daud, Al-Nasai dan Ibnu Habban.

Rasulullah s.a.w. juga menjelaskan keburukan orang yang tidak mengikut disiplin yang ditentukan Allah S.W.T. seperti dijelaskan oleh Al-Kahlaniyy di atas.

(Lihat: Al-Kahlaniyy, *Subul Al-Salam*, 1960/1379, Edisi 4, Jil. 2, hlm 22).

iv.Menuntut umat Islam supaya sentiasa bersikap positif dan berani. Hal ini adalah merujuk kepada hadis Abu Sa'id Al-Khudriyy r.a., bahawa Rasulullah s.a.w. memerintahkan sahabatnya memenuhi sof yang terhadapan supaya mara ke hadapan dan ikutnya dan mengikut mereka orang yang dibelakang mereka., dan kemudian Baginda berseabda;

"... لَا يَزَالُ قَوْمٌ يَتَأَخَّرُونَ حَتَّى يُؤَخَّرَهُمُ اللَّهُ."

Bermaksud:

"...Tidaklah sesuatu kaum itu sengaja mengambil tempat di (sof) belakang melainkan akan dikebelakangkan oleh Allah S.W.T."

Riwayat Muslim. (Lihat: Al-Kahlaniyy, *Subul Al-Salam*, 1960/1379, Edisi 4, Jil. 2, hlm 24)

v. Berjama'ah solat membina kesatuan pendapat dan pemikiran di kalangan anggota jama'ah. Dalam hubungan ini, An-Nu'man bin Basyir ada meriwayatkan dari Rasulullah s.a.w.:

أَقِيلَ رَسُولَ اللَّهِ (ص) بَوَجْهِهِ فَقَالَ: أَقِيمُوا صُفُوفَكُمْ - ثَلَاثًا - وَاللَّهِ لَتُقِيمَنَّ صُفُوفَكُمْ أَوْ لِيُخَالَفَنَّ اللَّهُ بَيْنَ قُلُوبِكُمْ
"...

Bermaksud:

“Rasulullah s.a.w. menghadapkan muka kepada sahabat=sahabat (dalam sof solat) dan bersebda: lurus kamu (diulangkannya tiga kali). Demi Allah, samaada kamu luruskan sof kamu atau Allah s.a.w. menjadikan perbezaan di atarahati-hatyi kamu (sentiasa berbeza pendapat.

(Riwayat Al-Bukhari dan Muslim serta Abu Daud.)

Demikian juga hadis Al-Barra' bin `Azib, bahawa Rasulullah s.a.w. bersebda:

كَانَ رَسُولُ اللَّهِ (ص) يَتَخَلَّلُ الصَّفَّ مِنْ نَاحِيَةٍ إِلَى نَاحِيَةٍ يَمْسَحُ صُدُورَنَا وَمَنَاكِبَنَا وَيَقُولُ: لَا تَخْلِفُوا فَتَخْتَلِفَ قُلُوبُكُمْ ...

Bermaksud:

“Bahawa Rasulullah s.a.w. masuk ke celah-celah sof kami dari satu bahagian ke satu bahagian yang lain sambil memegang dada dan bahu kami dan bersebda: Jangan kamu berbeza kedudukan (tiada sama sof), necaya akan berbeza hati-hati kamu ...”

Riwayat Abu Daud.

(Lihat: Al-Kahlaniyy, *Subul Al-Salam*, 1969/1379, Edisi 4, Jil. 2, hlm. 29)

vi. Latihan hidup bertolak Ansur; Perkara ini dapat difahami dari perintah menyamakan sof dan merapatkan diri antara satu dengan lain, di mana ia memerlukan sifat tolak ansor.

(2) Kemasyarakatan;

Semua sifat dan faedah dari solat yang dilakukan dalam sof solat berjama'ah menyumbang kepada persaudaraan seagama, pembinaan fikrah dan kesefahaman dan semangat amal jama'iy yang amat menyumbang kepada perpaduan umat, yang

merupakan prasyarat kepada kekuatan. Apa lagi jika solat berjama'ah itu disertai dan diimamkan oleh ketua dan pemimpin yang bertanggungjawab di negeri atau kawasan atau kariah berkenaan. Tentu usaha perpaduan ummah akan lebih berkesan.

8. Solat Berjama'ah Dan Masjid Sebagai Wadah Perpaduan Ummah:

Firman Allah S.W.T.:

ما كان للمشركين أن يعمرُوا مسجد الله شهدين على أنفسهم بالكفر أولئك حبطت أعمالهم وفي النار هم خالدون . إنما يعمر مسجد الله من ءامن بالله واليوم الآخر وأقام الصلوة وآتى الزكوة ولم يخش إلا الله فعسى أولئك أن يكونوا من المهتدين.

Bermaksud:

“Tidaklah bagi orang-orang kafir musrik itu memakmurkan (Manghidupkan) masjid-masjid Allah, sedang mereka menjadi saksi (mengaku) akan kekufuran diri mereka sendiri, mereka ialah orang-orang yang rosak binasa amalan-amalannya, dan mereka pula kekal di dalam neraka. Hanya sanya yang (layak) memakmurkan (menghidupkan) masjid-masjid Allah itu ialah orang-orang yang beriman kepada Allah dan Hari Akhirat serta mendirikan sembahyang dan menunaikan zakat dan tidak takut melainkan kepada Allah, (dengan adanya sifat-sifat tersaebut) maka adalah diharapkan mereka menjadi golongan orang-orang yang mendapat pertunjuk. (Al-Taubah 9 : 17 - 18)

Menurut Al-Qurtubiyy, bahawa ayat ini adalah dalil persaksian keimanan yang sah bagi pemakmur masjid kerana Allah S.W.T. menghubungkan keimanan dengan pemakmuran masjid dan orang sentiasa melaziminya. Kata sebahagian *salaf* bahawa apabila kamu melihat lelaki memakmur masjid maka hendaklah sangka baik kepadanya. Dalam hadis Abi Sa'id Al-Khudri, bahawa Rasulullah s.a.w. berseabda:

إِذَا رَأَيْتُمُ الرَّجُلَ يَعْتَادُ الْمَسْجِدَ فَأَشْهَدُوا لَهُ بِالْإِيمَانِ.

Bermaksud:

“Apabila kamu melihat lelaki sentiasa berulang-alik ke masjid maka persaksikanlah baginya dengan keimanan”

(Al-Qurtubiyy, *Al-Jami` Li-Ahkam Al-Qur'an*, (Al-Qaherah: Dar Al-Kitab Al-`Arabiyy, 1967/1387) Jil. 8, hlm 90)

Berdasarkan keterangan di atas, ternyata bahawa masjid adalah tempat sebenarnya untuk lelaki menunaikan solat-solat fardhu dan lain-lain aktiviti yang diharuskan untuk umat Islam.

Banyak fadhilat beramal di tempat tersebut selepas Masjid Al-Haram di Makkah, Masjid Al-Nabawiyy di Madinah dan Masjid Al-Aqso di Baitul Muqaddas. Tempat-tempat lain, seperti masjid yang tidak didirikan jum`at atau surau, adalah kurang fadhilat dibandingkan dengan tempat-tempat tersebut.

Berdasarkan nas-nas Al-Quran dan Al-hadith serta pendapat ahli-ahli feqah (ulamak), ternyata tuntutan berjama`ah di masjid atau di tempat azan di azankan amat kuat. Jika solat berjama`ah dilakukan oleh semua muslimin lelaki yang mukallaf di masjid atau paling kurang di tempat azan di azankan dengan cara yang sebaik-baiknya, ia pasti menghasilkan natijah yang berguna untuk diri dan ummah. Antaranya:

(1) Membina Displin Hidup Yang Tinggi:

Penghayatan solat berjama`ah dengan konsep di atas, pasti mendorong ke arah fenomena di mana setiap hari lima kali orang-orang Islam - terutama golongan lelaki - berbaris dalam satu sof yang rapi. fenomena ini sudah pasti melahirkan disiplin yang tinggi dari berbagai-bagai segi; pengurusan masa, pembersihan anggota badan menurut masa, sentiasa memastikan berpakaian sentiasa bersih, latihan berhimpun dan berbaris dengan teliti dan lain-lain aspek.

(2) Perhimpunan Yang Terbimbing (Al-Ta`aruf):

Pertemuan lima kali sehari, sentiasa dilakukan di bawah pimpinan seorang ketua, dengan matlamat yang sama mengagongkan Allah S.W.T., dalam disiplin kepimpinan dan kepengikutan yang menurut syarak, di mana makmum wajib mengikut

imam - di samping makmum boleh menegor imam jika ia melakukan kesalahan. Makmum juga perlu memastikan mereka berada dalam saf yang lurus, bertemu bahu dan bergerak dengan keadaan yang sama. Perhimpunan seperti itu pasti melahirkan masyarakat yang harmonis, hormat menghormati dan bersatu di bawah satu kepimpinan.

(3) Membina Kesefahaman Dan Kesatuan Fikrah (Al-Tafahum):

Solat berjama'ah menuntut perhimpunan umat Islam kariah berkenaan di satu tempat. Keadaan tersebut memudahkan pengisian segala jenis ilmu wahyu bagi sesuatu kariah oleh imam dan guru-guru lain dengan restu dan hasrat dari imam. Ini tidak syak lagi, menjadikan institusi masjid sebagai wadah membina kesatuan fikrah yang berkesan di kalangan umat Islam.

(4) Membina Semangat Persaudaraan Dan Kerjasama (Al-Takaful):

Solat berjama'ah dan institusi masjid juga merupakan wadah perancangan aktiviti sosial, termasuk merancang program gotong royong, ziarah anggota jama'ah yang sakit atau meninggal atau mengalami masalah, bertolong bantu antara satu dengan yang lain. Keadaan ini sudah pasti mendorong ke arah perpaduan ummah dan jihad yang lebih mantap.

Sebenarnya ibadah solat yang sekaligus dihubungkan dengan institusi masjid, adalah merupakan program dan wadah yang mengukuhkan pembinaan diri dan keluarga, yang sekaligus menyatu dan memantapkan perpaduan dan perjuangan umat Islam. Dari sinilah titik bertolak pergerakan mereka yang menginginkan kesejahteraan hidup dunia dan akhirat.

KESIMPULAN:

Dari penjelasan di atas, jelaslah bahawa;

■ Tuntan solat fardhu supaya dilaksanakan secara berjama'ah di masjid atau tempat azan di azankan adalah terlalu kuat - sabit dengan penegasan Al-Qur'an, Al-Hadith serta ijtihad ulamak.

■ Solat fardhu yang dilaksanakan secara berjama'ah lebih mendorong orang yang bersembahyang supaya melaksananya dengan lebih sempurna dan khusyuk.

■ Solat fardhu yang dilakukan dengan sempurna dan berjama'ah, lebih memberi kesan membina kekuatan keimanan dan perpaduan sesama umat Islam serta mencegah dari kejahatan dan kemunkaran (dengan segala bentuk gejala sosial pada semua peringkat umur manusia).

■ Solat yang sempurna menurut sunnah Rasulullah s.a.w. pasti mendorong pelakunya ke arah menjana segala perintah Allah S.W. T. sebagai cara hidup yang komplit (syumul) dengan penuh rasa tanggungjawab kepadaNya.

■ Keadaan yang membolehkan orang Islam menguzurkan diri dari solat fardhu berjama'ah amat terbatas, yang sekaligus memahamkan bahawa Rasulullah s.a.w. tidak membenarkan pengabaian solat fardhu berjama'ah dengan sengaja.

■ Gambaran suasana masyarakat dan negara Ahlus Sunnah Waljama'ah adalah suasana di mana Rasulullah sebagai ketua masyarakat bersama sahabat-sahabat sebagai masyarakat dan rakyat negara Islam yang sentiasa mengambil berat penghayatan solat fardhu berjama'ah sehingga perhimpunan untuk solat fardhu berjama'ah awal waktu menjadi paksi kepada pengurusan masa bagi pergerakan dan pentadbiran urusan peribadi dan masyarakat serta negara umat Islam itu.

"Rabbana aatina fiddunya hasanah, wa fil aakhirati hasanah, waqina `azaaban naar"

Susunan;

Dr. Mohd.Arshad Hj.Taib

30 / 6 / 1999.